

EEEhregssellschaft syy, oder nit derbyy, das isch do d'Froog.....

Frey no Schüttelbier

Zue de Drey EEE gheere mir nit derzue,
das losst uns syt Joore aifach kai Rueh.
Die südbadische Bruederschaft het uns nit welle,
das mien mir eych aifach verzelle.

Mir hänn jetzt unseri aigeni Ehregssellschaft gschaffe,
quasi als Drey EEE Gegewaffe.
Dr Goldhamschter hänn mir zem Wappedier bestimmt,
will är sich uff uns ächti Glaibasler rynt.
Gebohre vo drey Glaibasler Deggter,
dr Äskulap-Hammer in d'Luft streggt er.
Schwarzi Bääre liige uns eender färn,
und iberhaupt gheere die no Bärn.
(E Bäär hämmer scho mol gha,
drum leen mir jetzt dr Hamschter dra.) *Aamergig vo dr Red.*

Är duet im Unterhalt nit vyyl koschte,
kunnt wie die maischte Glaibasler us em nooche Oschte,
duet gärn in jedem Dräggloch huuse
und kunnt am liebschte nur im Dungle uuse.
Noochwyyslig isch är do haimisch syt de sächziger Joor
und kunnt zem Dail in rauhe Mänge voor.

So gseh gheert är zue de alt yygsässene us em glaine Basel.
Jetzt isch aber Schluss mit däm Hamschtergfasel.

Mir kenne fir d'Mitgliedschaft nur ai Bedingig,
de findsch s'Glaibasel isserscht stimmig,
mit und ohni Alkohol,
fiehsch di im mindere Basel wohl,
pflgesch Sitte und Gebrych vo dir dehai,
bisch sällte gärn allei.

Bisch schwarz, grau wie d'Panther, oder gääl,
rot, brun oder wyss wie Mähl,
blau darfsch sy und sogar e Hund, e Griene,
ainzig Zircher findsch bi uns sällte bis niene.

Duesch nit gärn schaffe, ab und zue d'Arbet schwänze,
mir sinn offe und kenne fascht kaini Gränze.

Sottigi mit sälber gschtrigge Kappe,
oder die mit Kopfdiecher fir nynzig Rappe,
Basler, Schwyzer und au Fremdi,
uffklärte und extrem verglemmti,
die Digge, die Dinne, die Hälle und die Dungle,
au die wo gärn dien Schunggle,
Waggis, Letschedaaler und Orientale,
au sottigi wo fir s'Drämmlig nit dien zahle,
alli wärde bi uns als Gsellschaftsbrieder geehrt,
so wie sich das im Glaibasel gheert.

Duet dir innovative Sport vyyl bringe,
zem Bischbyl Schiesse, Mässer wärfe, oder ringe,
Verfolgigsjagde, oder Lyt verschregge,
d'Schugger us em Schloof uffwegge,

mit klaute Velo durch d'Stroosse pfyffe,
oder sich an fremde Handdäschli vergryffe?
S'Wichtigscht isch de hesch e Hobby,
denn gheersch au du zu unserer Lobby.

Au konfessionell sinn mir ganz offe,
bi uns darfsch Atheischt sy, oder uf Prophete hoffe,
sträng protestantisch, oder schwach katholisch,
oder au nur geistlich alkoholisch,
Hauptsach de gheersch nit zer alte Richtig
und bisch kai Olymper, das isch uns wichtig.

Omnipolitisch sehr agktiv,
stochere mir im Roothuusmyyf.

Bi jedere Stroosseverlochete sin mir drbyy.
Multikulturell wänn mir au sy,
drum dien mir au dr Karneval bigoo
und am Elfte-Elfte dr Hamschter uuseloo.
Punggt Elfi-Elf leen mir ihn springe
und dien helau, alaaf und ähnliggs singe.
Deert wo d'Stroosselecher zem Bode uusekemme,
kenne mir s' "wolle mer se rauslasse?" nit verglemme.

Bissigi Leye und schreegi Veegel wo sich dien ver-gryffe,
wildi Männer wo em Hamschter d'Aier schlyffe,
all das hole mir us dr Horrorzaine
und mache druss e Määrlibuech fir unseri Glaine.

An unserem Feschtdaag sinn mir ganz bsunders aige,
dien is mit schwarzem Huet und Schaale glaide.
Iber die Mittler Brugg leen mir ä Hamschter hipfe
und dien ganz artig d'Hietli lipfe,
vo-n-ere Gugge kemme derzue die schreege Deen.
Statt Ueli seggle bi uns goldigi Gleen.
E gschliffe Määhli dien mir gniesse,
das duet no grad dr Vogel (Gryff) abschiesse.
Hänn mir denn au no gnueg drungge,
pagge mer dr Ley am Schungge
und wenn am Änd ain no ka,
denn spiilt är no schnäll dr Wild Maa.

Damit's nit usgseht als wurde mir kopiere,
dien mir das ganz e Däägli friener fyyre.

Jetzt kemme au mir in d' Glaibasler Anale,
als die ganz bsunders yfallslos banale.

Wenn de jetzt s'Gfyyhl hesch, das muess ych au ha,
denn wart nit lang und mäld di a!

[HTTP://WWW.EEGOHA.KUM\(M\)](http://www.eego.ha.kum(m))

Noochtrag zue Goldhamschter und verwandte Sorte:
D'Schwyz isch bekannt an vyyle Orte,
dangg D'Amato und Konsorte,
fir's Raubgold wo si schyynts dieg horte!

*D'Laddärne-Uusstellig isch vom Määntig znacht, em 22. Hornig,
bis am Mittwoch demorge, em 24. Hornig, uff em Minschterplatz.
Mir fraien is uff Ihre Bsuech.*